



UKA 2017/129

14/11-2017

Justus Hansen

**Nunatta EU-mut EU-mullu attuumassuteqartunut suleqateqarnerulernissaanik periarfissat pillugit nassuiaat.**

(Namminiilivinnermut, Nunanut Allanut Nunalerinermullu Naalackersuisoq)

Demokraatini Naalackersuisoq qutsavigerusupparput manna nassuiaat pillugu. Suliarineqarpoq Demokraatit UKA 2016-mi siunnersuutaat tunngavigalugu aamma nuannertuaannarpoq nammineq siunnersuutigisimasat timitalerneqaraangata.

Nassuiaatip imaata aamma takutippaa siunnersuut pisariaqarsimasoq. Nassuiaammi tikkuarneqarput immikkoortut arlallit ersersitsisut EU-mik suleqateqarnerup allisarneqarsinnaasoq aamma taamaasilluni erserpoq nunarput arlaatigut iluaqutissarsissunneqarnerusinnaasoq.

Demokraatini Bruxellesmi sinniisoqarfiup suliai paasilluarpagut ataqqillugillu aamma paasisinnaalluarpagut sinniisoqarfik maannakkutut inuttaqartinneqarallartilluni nukissaqarfigingikkaa suliniutinik nassuiaammi taaneqartunik aallartitsissalluni.

Demokraatinili EU-mik suleqateqarnerulernerup iluaqutissarsivigineqarnerusinnaanera takusinnaavarput. Neriutigaarput aammalumi qularnanngilaq iluaqutissarsiat taakku sinniisoqarfimmi sulisoqarnerulernissamut immikkut aningaasartuutit imminut akilersinnaanngortissinnaassagai.

Suallakkunnaangilagut missingersuutaareersut iluanni sulisut qinnuigissagaluarutsigit suliassaq naammassissagaat tamatumammi kinguneriinnartussaavaa suliassat ingerlanneqartartut allat kinguartikkallartariaqarnissaat.

Demokraatini isumaqarpugut nunaqavissut suliffiutaat inuiaqatigiillu EU-mik suleqateqarnerulernikkut naliginnaasumik iluaqutissarsissunneqarsinnaasut. Assersuutigalugu Bruxellesimi sinniisoqarfimmi sulisoqarnerulernikkut EU-p suliniutai angisuut atorluarneqarnerulersinnaagaluarput soorlu "Horizon 2020", nutalliornermut ineriartortitsinermullu tunngasoq aamma "Erasmus +" ilinniartitaanermut tunngasoq. Suliniutinut taakkununga piffissami 2014-miit 2020-mut 700 milliarder koruunit atugassiissutigineqarnikuupput. Aningaasarpaalussuupput.

Iluaqutissarsivigineqarsinnaanngillalli nalungaanni taakkuusut aamma nalungaanni qanoq pissarsisoqarsinnaanersoq. Tassani Demokraatini isumaqarpugut siunnersuisarfik pitsaasoq kommuninik, sullissivinnik, suliffinnik inunnillu ataasiakkaanik qanoq iliortoqarsinnaanera pillugu



ilitsersuisinnaasoq atorfissaqartikkiptut.

Soqutaanngilaq karsi aningaasanik qanoq imaqartigigaluarpuunniit qinnutigineqarsinnaasunik nalungaanni qanoq qinnuteqartoqarsinnaanersoq. Atagu "Horizon 2020" assersuutitut taalara. Savalimmiut 10 millioner koruunit missaanni ukiumut akiliisarput Horizon 2020 -mut peqataanerinnarminnut tunngavilersuutigalugu savalimmiuni suliffeqarfiit peqataanerinnarmikkut ilisimasassarpassuarnik pissarsisarnerat. Kalaallit amerlanerit EU-p suliniutaanut peqataasalertuuppata qularnanngilaq kalaallit inuiaqatigiit iluaqutissarsissunneqarnerusalissagaluarput. Kisianni oqareernittut imaaliallaannaq aningaasanik taakkunanga qinnuteqartoqarsinnaanngilaq.

Qinnuteqarnermi periutsit kiisalu uppersaasersuineq taamatullu nalunaaruteqartarnissaq suliaapput imaannaanngitsut arlalinnit isumagineqartariaqartut, EU-p suliniutai aqutugalugit EU-p aningaasaataanik qinnuteqassagaanni. Qinnuteqarnermi periutsit kalaallinut qinnuteqarumaartussanut aporfioriaannaapput. Taamaattumik iluaqutaassagaluarpoq maani nunami sullissivimmik peqartoqartuugaluarpat ikiuisartussamik aamma EU-p suliniutaanut kalaallinik qinnuteqarusuttunik siunnersuisartussamik, suliaq tamanna pisariinneruleqqullugu.

Demokraatit isumaat naapertorlugu sullissivik taanna Namminersorlutik Oqartussani naalakkersuisoqarfiit arlaannulluunniit immikkoortortaassanngilaq nunaqavissulli suliffiutaanut namminersortumut eqqortunik piginnaanilimmuut isumagisassanngortittariaqarpoq. Tamanna aaqqissuunneqarsinnaavoq kiffartuussinermut isumaqatigiissusiornikkut imaluunniit periuseq alla atorlugu.

Uteqqillarali; pisariaqarpoq politikikkut tamatumap iluaqutissarsivineqarsinnaanerata upperineqarnissaa kiisalu tamanna tunngavigalugu politikikkut pingaarnersiusinnaanissarput, immikkoortup taassuma amerlanerunik aningaasaliiffiginissaa qularnaarumallugu.

Demokraatini piareersimavugut taamatut pingaarnersiuinissamut qularinnginnatsigu aningaasaliinerujumaartoq imminut akilerluarsinnaasoq.

Taamatut oqaaseqarluta nassuiaammut qujavugut qilanaarlutalu partiit allat isumaasa tusarnissaannut.